

T1742/48226(8)

THE CHINESE-JAPANESE LIBRARY  
OF THE HARVARD-YENCHING INSTITUTE  
AT HARVARD UNIVERSITY

MAR 1 1954

管子窺輯要 八

紫微垣星圖

此及宮總論

紫微垣說

紫微垣歌

紫微垣考

紫微垣 別本參考

占紫微垣

紫微垣諸星去極度數考

紫微垣列座

附 客星流星彗字雲炁干犯占





上宰少宰上弼少弼上衛少衛上丞西藩七星右  
樞少尉上輔少輔上衛少衛少丞當門六星天牀  
右樞西一星天乙也次西一星太乙也西藩少尉  
西二星曰內厨東藩少弼東北六星曰天厨東南  
七星曰扶筐天鈎九星在東藩少衛東西藩之西  
太微之北八星北斗并輔也魁則有樞璇璣權之  
名柄則有玉衡開陽搖光之稱柄南三星曰三公  
魁西三星曰三師璇西六星天牢也魁前六星  
文昌也上衛前六星曰內階傳舍西八星曰八穀  
魁中四星曰天理魁西四星曰四勢斗南一星天  
相也次西一星太陽守也杓左三星天槍也右五  
星天棓也天槍西一星戈也後門東邊二星贄府  
也垣外一星太尊也北極一名天極一名北辰其  
紐星天之樞也故又名天樞天運無窮三光迭耀  
而極星不移故曰居其所第一星主月太子也第  
二星主日帝王也亦爲太乙之座謂最赤明者也  
史記云中宮天極星其一明者太一常居也第三  
星主庶子也中星不明主不用事右星不明太子

有憂也第四星爲后主第五星爲天樞張衡云二星并爲后宮謂第四第五之二星自唐以來曆家以儀象考測則南北極之正實去極星之北一度半蓋中原地勢之度數也宋仁宗皇祐中以銅儀管候天其不動處猶在樞星之末一度餘朱文公語錄曰向來人說北極便是北辰皆只說北極不動至本朝人方去推得是北極只在北辰邊頭而極星依舊動沈括云天中不動遠極星三度有餘祖暉謂極星去天中猶一度有餘其考究尚爲未

審

候天者六千里差十五度常以天中爲北蓋以極星常居天中也謂天常北傾可也謂極星偏西則不然北極不于坎乾而于艮丑以艮東北萬物之所以成終而所以成始也紐星爲第一而志反以爲第五不以紐星爲帝而以從極之赤明者爲帝此當辨勾陳口中一星卽大帝之座不當遂指爲天皇大帝然則北極五星之辨如何聞之師云天樞紐星在四輔中者是謂天皇大帝其神曰耀魄

寶此是也故初一日帝次二曰后次三曰妃次四曰太子乃其赤明者也次五曰庶子更詳之

凡帝星見處最多蓋中垣紫微天子之大內也帝常居焉上垣太微天子之正朝也帝常聽政則居焉下垣天市天子畿內之市也每一歲帝一臨焉凡建國中爲王宮前朝而後市蓋取諸三垣也大角爲天王之座春王正月新政居焉心之大星爲天王正位蓋人者天地之心而天子也人之主故以爲名也北斗第一星爲天子之象言其臨御之柄也其天皇天乙太乙言帝之神也北極言帝之德也凡北極五星明大則吉變動則憂

四輔四星抱天樞所以輔佐北極而出度授政也張衡云抱極之細星也蓋卽虞之四鄰在周則師氏保民乃王者四友之臣也主贊萬機小而明則吉大明及芒角則臣逼君若暗則官不理

勾陳六星屬土象坤故其數六天子親軍護於前將軍之象也主六軍大司馬巫咸曰主天子護軍卽不當以爲後宮又不當以爲正妃矣隋志悞耳

張衡云大帝常居之宮也明則吉暗則人主惡之  
天皇一星在勾陳口內主御羣靈秉萬幾神圓也  
其星隱而不見見則蓋天明則日月不明王者聰  
明睿智而不敢用其聰明故冕旒蔽目絰纒塞耳  
此星爲大帝之座不遂指爲天皇大帝

六甲六星分掌陰陽紀節候太史正歲年以序事  
者故在帝傍所以布政教敬授民時也明則陰陽  
和否則寒暑易節

華蓋九星爲蓋七星爲杠如蓋杠之狀杠附華蓋  
凡十六星共爲一座斜於上所以承兩日而蔽帝  
座也明正則吉輕動則凶

傳舍九星近河主北狄驛館故不明則胡兵入  
國明則吉客星守之備姦使亦主胡兵入

閣道六星在王良前飛道也張衡云天子遊別宮  
之道也故從紫微宮絕漢抵營室一曰王良旗一  
曰紫宮旗亦所以爲旌表也不欲動搖若動搖則  
宮掖之內兵起其占一星不具則輦道不通

五帝座卽五小寢退朝宴息之處黼辰之象所以

備宸居者也明正則吉變動則凶隋志云客星犯紫微宮中座大臣犯主

天柱五星法五行主晦朔晝夜以知天文之次序馮相氏會天位叙四時也測度在內之事故中宮天柱主推步隋志云常以朔望日垂禁令於天柱以示百司周禮以正歲之月示法象魏此之謂也明正則人安陰陽調否則司曆過也

御女四星乃八十一御妻之象晉志謂御女宮明則多內寵暗則吉

柱史乃柱下史記君之過左右史之象也明則史辭直暗則佞

女史佐后禮事而記其美惡者也主傳漏漢時有侍史張衡曰婦官也主紀宮中之事明則其辭直暗則女宮佞

五尚書出納王命虞之納言周之內史宰夫之職張衡曰八座大臣之象爲天喉舌斟酌元氣運乎四時賦政四海占同四輔

陰德二星在左樞之北五尚書之西舊在少尉之



左非也主施恩赦君德以仁爲主也占以暗爲宜明則新君踐極又爲女主之象動搖則禍起宮掖隋志云尚書西二星曰陰德曰陽德主周給賑撫則又分爲二座矣非也史記云前列直北斗口三星隨北端銳若見若否曰陰德或曰天一更詳之兩藩十五星宿衛周禮宮伯所掌八次八舍天子之武備國家莫重之務周禮掌於宮伯官府庶子皆統之故中宮者衛士常居也若勾陳天棊則爲常隨若虎賁郎位則爲侍朝矣舊說東藩近闔闔門第一星爲左樞第二爲上宰第三爲少宰第四星爲上弼第五爲少弼第六爲上衛第七爲少衛第八爲少丞西藩近闔闔門第一星爲右樞第二爲少尉第三爲上輔第四爲少輔第五爲上衛第六爲少衛第七爲少丞立此將相等名皆非也兩藩一名天營一名旗星一名長垣皆藩衛之臣十五星均明大小有常則吉若明太盛則內輔專權宮垣直而明盛則天子出自將宮中兵若垣闕則兵起兩藩正南開如門象故名闔闔門有流星自

門而出四野者當有中使啣命視其所適野而諭之也

天床當闔闔門主天子寢舍解息燕休之處枕席牀第之司於周禮則王府之所掌一云在宮門外聽政之象明大而正則吉君有慶暗凶傾倒則人主不安天乙一星在右樞之南天帝之神也主戰聞知人吉凶張衡云天乙遍闔闔門外其占明而有光則陰陽和萬物成人主吉暗則反是

見宗統

太乙一星在天乙西亦天帝之神也主使地主陽德和德呂申高叢太陽太炁犬威天道犬武武德犬簇陰主陰德犬義之十六神知風雨水旱金革饑饉疾疫災害之應及所在之國當之其占與天太乙略同明則吉不明或移則有憂星經云天乙太乙主王卽位微則廢主不當其所失次變色宗廟不享矣太乙先知主客勝負至誠如神所以首出庶物也太乙除五宮不居其八宮每三年一移至二十四年一周天若天目行十六神陽局遇朝乾坤重一算陰局遇艮巽重一算每十八年一周

從天目算起至太乙之前止得主算之數乾坤艮  
巽坎離震兌八宮爲正神戊亥丑寅辰巳未申八  
宮爲間辰陰德與乾各一數離二數艮三數高叢  
四數太簇六數犬武與坤各七數坎八數巽九數  
太乙天目在陽算得偶爲和在陰算得奇爲和所  
謂陽者坎艮震巽北與東二方也所謂陰者離坤  
兌乾南與西二方也自陰德至辰爲居天內助主  
人不可出兵自巽至戌爲居天外助客利興兵其  
舉旗之法算得一八用曲陣舉黑旗算得三與十  
用直陣舉青旗算得四九用銳陣舉赤旗算得二  
五用圓陣舉黃旗算得六七用方陣舉白旗  
內厨六星主六宮內之飲食府也一云后與夫人  
及太子飲宴於周屬膳夫居常則吉五星守犯則  
凶

天厨六星天子百官之厨也主饌食明則吉暗則  
厨饌不給

扶筐七黑星與天厨相比乃后妃盛桑之器主勸  
蠶也列於垣者帝親畊后親蠶爲天下先之象明

則吉暗或移徙則絲綿不成不見則女工失業

天鈞九星如鈞之狀在造父西天厨上入河中分

危初度主輿服法駕其占明則服飾正直則地動

北斗主出號令運於中央臨制四方建四時均五

行七政之樞機陰陽之本源也有君道焉移節度

定諸紀皆係於斗魁總四星爲璇璣杓總三星爲

玉衡史記云斗爲帝車取運動之義也所謂玉繩

者指玉衡北兩魁也魁第一星曰天樞有臨御之

柄第二星曰璇第三星曰璣第四星曰權第五星

曰玉衡第六星曰闔陽第七星曰搖光又曰樞爲

天璇第二爲地璣第三爲人權第四爲時第五爲

音第六爲律第七爲星石氏曰第一星爲正星主

陽德天子之象也二曰法星主陰刑女主之象也

三曰令星主禍害也四曰伐星主天理伐無道也

五曰殺星主中央助四方殺有罪也六曰危星主

天倉五穀也七曰部星又曰應星主兵又曰一主

天二主地三主火四主水五主土六主木七主金

又曰一主秦二主楚三主梁四主吳五主趙六主

燕七主齊馬融註曰一主日二主月三主命火四  
主煞土五主伐水六主危木七主伐金故名七政  
張衡云天子不祭宗廟不敬鬼神則第一星不明  
若廣營宮室妄鑿山陵則第二星不明或變色若  
不愛百姓驟興徭役則第三星不明或變色若發  
號令不明天道不務稼穡峻法則第四星不明或  
變色若廢正樂務淫聲則第五星不明或變色若  
峻法濫刑遠賢用佞則第六星不明或變色若不  
撫四方不辨夷夏不事名山大川之祀則第七星  
不明或變色七星相去九千里其二陰星不見者  
相去八千里也凡日月暈連環及斗白暈與搖動  
皆爲兵起其旁及中小星多則天下不安人多怨  
一云斗旁欲多星則天下安斗中少星則國人散  
天下多訟五曜及客星入守皆凶彗孛尤甚斗主  
斟酌損益北斗爲酌量元氣若斗星晝見主大亂  
輔一星輔乎開陽所以佐斗成功也丞相之象又  
曰主危正矯不平占欲小而明若大而明則臣奪  
君政小而不明則臣不任職明大與斗同則國暴

管窺 卷之十八  
兵大起暗而遠斗則臣死不死必奪職凡近臣立  
黨排賢用佞則輔生角近臣擅權謀宗社則輔生  
翼輔星明而斗不明則臣強主弱斗明而輔暗則  
主強臣弱

三公在杓之南主變理陰陽弼君機務居常則安  
移徙則凶金火守之三公有凶乃太尉司空司徒  
之象師而不臣者也宣德化調七政之官

三師在魁第一星上亦曰三公疑作三孤乃貳公  
弘化寅亮天地者也調七政和陰陽之官宋中興  
天文志云杓南三星及魁上之三星曰三公三孤  
天牢六星在文昌之下斗魁之上史記作斗魁中  
乃貴人之牢主繩牽過禁暴淫有八議焉故禮公  
族有罪則於甸人占以不見爲善明大則獄事煩  
暗則刑罰簡中有小星則貴人下獄

文昌如筐形天之六符也主集計天道王者代天  
理物已何與焉文命敷於四海法文昌也舊說一  
曰上將大將軍建威武二曰次將尚書正左右三  
曰貴相太常理文辭四曰司祿司中司隸賞功進

爵五日司命司怪太史主災咎六日司寇大理佐  
 理實所謂一者起北斗魁前近內階者也史記作  
 四日司命五日司中六日司祿漢書作五日司祿  
 六日司災然北辰居中列宿咸以為準其為司中  
 無疑矣虛宿下自有司祿司命故知星家註釋之  
 謬光明黃潤大小齊則百職理天瑞臻萬人安青  
 黑細微則多災搖動移徙大臣有憂金火入守兵  
 大興亭彗犯則國亂一曰文昌動則三公受誅后  
 崩與三公同占

內階六星天皇陞降之納陛也明則吉傾動凶  
 八穀在西籬外五車北黍稷稻粱麻麥菽苽也舊  
 解為大麥小麥赤荳大荳止菽麥二穀矣一作一  
 主稻二主黍三主大麥四主小麥五主大荳六主  
 小荳七主粟八主麻明則八穀成暗則不熟一星  
 不見則一穀不登八星不見則國人莩  
 天理執法大臣之象貴人之牢也王者尚德緩刑  
 故欲暗暗則吉明及動搖與中有星為貴人下獄  
 勢四星臨御之柄惟辟作威作福所謂八柄御羣

臣也然夫履貞厲故不欲其明古者或有營官竊柄而威福恣行以致明大占書遂謂明則刑餘用事實非宦者之主星也

相一星乃三公論道經邦變理陰陽隋志云總領百官而掌邦政以佐帝王安邦集事也明而小則吉芒角張則臣強或不見則政事不理

太陽守大將大臣之象主戒不虞設武備也明吉暗凶移徙則大臣誅動搖則兵起王應電云乾之德也昊天象與昴宿太陰相配守字衍天槍亦曰天鉞所執以威四方伐無道乃天之武備所以禦難也

天棓天子先驅所以禦難備非常也一星不具國兵起暗亦國兵起芒角則兵大起一作主忿爭明大凶小則吉與天槍同占

天戈亦曰天弋一作玄戈在招搖南一名天鋒君德以剛爲主故天帝用之以斷主胡兵芒角大而動則四夷兵起又主北夷客星守之胡大敗與梗河同占



贊府二星在後門東邊步天歌有之王應電缺此  
太尊天子之尊屬貴戚也或名天尊在中台北明  
則吉暗則凶不見則國有大憂巫咸云聖公之象  
也居常爲吉金犯守則災貴戚相敗

紫微垣說

紫微團圓皇極不移衛分乎樞丞宰輔弼之異極  
兼以后宮庶帝太之殊六甲所以出入省察而授  
農事四輔所以出度授政而佐萬機天皇執萬神  
之圓象勾陳爲太帝之正妃內座集議之所華蓋  
覆蔽之儀傳舍賓客之驛館閣道遊幸之旗旌天  
柱懸法於象魏御女乃侍帝之御妻柱史主紀過  
史臣之職女史主紀繫婦人之微咨謀出納分尚  
書之象施恩賑濟也陰德之爲大理主平刑而斷  
獄天牢主繩愆以禁非太帝升降之陛爲內階而  
主明堂天子休憇之所爲寢舍而曰天床天厨主  
盛饌之事內厨主飲食之常天乙治十二將西司  
戰鬪太乙使十六神而知凶荒豐儉須占八穀桑  
蠶必察扶筐斗象帝車出號令而斡旋萬化輔爲

丞相變理而作斗平章三公佐萬機而宣德化三師爲模範而和陰陽總領百司今天相集計六府者文昌策主兵馬僕御天鈎爲服飾鸞輿天理貴人之獄勢爲內傳刑餘天槍天之武備天楛天子先驅太陽守爲大臣將相設武備主戒不虞

紫微垣歌

中元北極紫微宮北極五星在中呈太帝之座第二珠第三之星庶子居第一號曰爲太子四爲后宮五天樞左右四星是四輔天乙太乙當門路左相右樞夾南門左八右七十有五上少宰今上少輔上少尉今上丞數前連左樞共八星後邊門東大贅府少尉上輔少輔繼上尉少尉少丞比以及右樞共七星兩藩營衛於斯至陰德門裏兩黃聚尚書以次其位五女史柱史各一星御女四星天柱五大理兩黃陰德邊勾陳尾指北極顛勾陳六星六甲前天皇獨在勾陳裏五帝內座後門是華蓋并杠十六星杠作柄象華蓋形蓋上連連九個星名曰傳舍如連丁垣外左右各六珠右是內階

左天廚階前八星名八穀廚下五個天棊宿天床  
六星兩樞外內廚兩星左樞對文昌斗上半月形  
稀稀朗朗六個星文昌之下曰三師太尊只向中  
台明天牢六星太尊邊太陽之守四勢前一個宰  
相太陽側更有三公柄西偏卽是玄戈一星圓天  
理四星斗裏暗輔星近着開陽淡北斗之宿七星  
明第一主帝爲樞精第二第三璇璣星第四名權  
第五衡開陽搖光六七名搖光左三天槍江

紫微垣考

紫微垣十五星東籓八星西籓七星 北極五星  
在紫微宮內其紐星天之樞也 四輔四星抱北  
極樞星 天皇大帝一星在勾陳口中 勾陳六  
星在五帝內座下 五帝內座五星在華蓋之下  
勾陳之上 天柱五星在華蓋杠傍近東垣北隅  
柱史一星在北極東 女史一星在柱史北  
御女四星在勾陳東北 尚書五星在女史東南  
維 大理二星在宮內垣門之左近陰德 陰德  
二星在尚書之西南 六甲六星在華蓋柄左傍

華蓋七星杠九星在帝座上 天乙一星在閭

闔門外右樞之南 太乙一星在天乙南 傅舍

九星在華蓋上 內階六星在文昌之北 天厨

六星在少弼東 天床六星在閭闔之前 內厨

二星在北极垣外西南角 北斗七星一至四為

魁五至七為杓杓携龍角衡殷南斗魁枕參首斗

為帝車運於中央臨制四卿分陰陽建四時均五

行移節度定諸紀皆繫於斗 輔一星輔於開陽

之傍 天理四星在斗魁中 招一星在北斗第

五星傍 太陽守一星在天相西 勢四星在太

陽守西北 三公三星在北斗柄西 三師三星

在斗魁第一星西 文昌六星在斗魁前 天牢

六星在文昌斗魁之前 太尊一星在中台北

八穀八星在內階前 天棊五星在女床東北

天槍三星在北斗杓東 玄戈一星在北斗杓端

紫微垣 別本參考

紫微十五星列東西以籓八極東籓八星西籓七  
星位在北斗之北一曰帝之座天子之常居也其

南兩藩兩星之間名曰闔闔門東藩第一星曰左  
樞二星曰上宰三星曰少宰四星曰上弼五星曰  
少弼六星曰上衛七星曰少衛八星曰少丞西藩  
第一星曰右樞二星曰少尉三星曰上輔四星曰  
少輔五星曰上衛六星曰少衛七星曰上丞明大  
吉直則兵起

北極五星在紫微宮一名北辰大樞卽紫微也天  
運無窮三光迭耀而極星不移故曰居其所而衆  
星共之第一星主月太子也第二星主日帝王也  
第三星主五行庶子也中星不明主不用事右星  
不明太子憂五星俱明大吉第四星爲后宮第五  
星爲紐星遠而不甚明日天樞此星在四輔之內  
○又一說北極非北辰蓋無星不動處爲辰就此  
空處經星隨天左轉日月與金木水火土五緯右  
轉有似環向而歸卽北極一星亦是就近環繞者  
耳

四輔四星抱佐北極以出政者也小而明吉大明  
芒角動臣逼若暗則官不理政○勾陳六星在華

蓋下乃上帝之后宮也三宮九嬪侍櫛於此明盛則吉又云六星土象坤數六也班固曰周以勾陳之位蓋土居五行中而四時之氣備勾陳居龍虎鶉龜中而四方毛羽鱗甲之蟲無不統所以爲中宮之衛○天皇大帝一星在勾陳口中其神曰耀魄寶主出命符以呈天子立五禮御羣靈秉萬機其星隱而不見吉○五帝內座五星在華蓋之下勾陳之上象斧辰以備宸居明吉○六甲六星在華蓋枉星之旁主分陰陽紀節候所以布政授時者明則陰陽和不明則寒暑失節○華蓋七星枉九星共十六星在勾陳上所以覆庇帝座爲庶子之官也明正吉詩爲章於天○天柱五星在五帝座之東天命之以引導二十四氣者法五行主晦朔晝夜之職明大則吉○御女四星在勾陳之東八十一御妻之象一曰御史宮主禮儀侍帝宴寢不欲大明明則內寵○女史一星在柱史西南婦官之微者主傳漏記時記宮中緊要之事明則記得其實○柱下史一星在北極之東南與尚書相

近主左右記天之過一日厨書之所藏也明則史  
直○尚書五星在大理之東北八座大臣之象爲  
天喉舌斟酌元氣運乎四時賦政四海共治天下  
又主咨謀納言小而明則吉○陰德二星在太子  
之南尚書之西○大理二星在左樞之北宮門之  
內決獄之官明則刑平○天床六星在閭闔門口  
天子寢息燕休之處正大而明吉

以上皆紫微垣內之星

傳舍九星在華蓋之上與河爲隣賓客之館主胡  
人入國之舍又主防奸使客星守則胡兵入境○  
八穀八星在紫微西籓之外華蓋之西一稻二黍  
三大麥四小麥五大荳六小荳七粟八麻主候歲  
之豐凶明吉不見則荒○內階六星在文昌之北  
天皇之階延賓客而入者也明正吉○天厨六星  
在垣之東天子百官之厨也主御膳見則吉○內  
厨二星在垣外西南之角后夫人與太子飲食之  
府也不宜變動客守凶○天乙一星在閭闔門外  
右樞之西天帝之神也主天道又主戰鬪知人吉

凶明則陰陽和萬物成人主吉○太乙一星在天  
乙西亦天帝之神也主使十六神知風雨水旱兵  
革饑饉灾疾占與天乙同○北斗七星在紫微垣  
之外太微垣之北第一星爲天樞二星爲天璇三  
星爲天璣四星爲天權五星爲天衡六星爲開陽  
七星爲搖光一至四爲魁五至七爲杓一曰正星  
主陽德二曰法星主陰刑三曰令星主禍害四曰  
伐星主伐無道五曰殺星助四方殺無道六曰危  
星主天倉五穀七曰部星主兵天經註曰騎官角  
李將星也匡衛藩臣九子三垣門內之六諸侯於  
是乎揮齊七政而霽隴皆其功也九子尾星也霽  
雨聲也隴泉實也○輔星一星在開陽之旁所以  
佐斗成功也主輔政持危丞相之象小明吉○天  
理四星在北斗之魁中執法決獄之官巫咸曰水  
官也主司三公糾貴臣星不欲明明則法峻○三  
公三星在斗杓西主變理陰陽弼成機務三師三  
星在斗魁東主宣德政調七政和陰陽俱爲大尉  
司空司徒之象天子之輔臣也黃大明潤則吉○



勢星四星在太陽守之東北刑餘之象也明則弄  
權天牢六星在斗魁之下貴人牢也主繩愆禁暴  
淫星隱則貴人多○文昌六星在斗魁之前與內  
階相近其形如筐天之六符也主記禍福明天道  
天官書曰文昌六司之會計也第一星爲上將主  
建威武第二星爲次將主正左右第三星爲貴相  
主理文籍第四星爲司命主賞功進德第五星爲  
司中主司過詰咎第六星爲司祿佐理大寶第四  
五六星與三吉同黃帝占曰文昌宮者天府之離  
宮也明大則台金火守孛犯國亂搖動則三公誅  
后崩○相星一星在北斗之南天之丞相也主總  
領百官安集衆民又主衣服文章大明則吉○太  
陽守一星在相星西主守衛帝宮以戒不虞大臣  
大將之象明則威振四方○大尊一星在中台之  
北一曰天尊聖公貴戚之象居常而明吉○天槍  
三星在斗北搖光之前一曰天鉞天之武備也星  
欲忽忽不明○玄戈一星在斗杓之端招搖之北  
一曰天戈主北夷明而小則吉大明芒角動夷兵

起

招搖一星詳載氏宿內

天棓五星在女牀之東北天厨之東南天子之先驅所以禦難也主禁暴又主爭訟明靜吉

以上皆紫微垣外之星

按中宮天極五星勾陳六星皆紫宮中最尊者也張靈憲曰黃神軒轅於中天五居十於中爲戊巳屬土應天極五星地六居十二支中爲辰戌未屬土應勾陳六星在天爲辰在地爲土故張氏以黃神目之其曰五宮五七三十五名者以北斗七星爲帝車以斡旋造化也

### 占紫微垣

天中最尊紫微元皇大帝北辰也衆星拱之天運無窮三光迭輝而極星不移若金火非道輒有所犯中國亾故不錄之從南第一星主月太子第二星最明者天皇帝大帝之正位第三星不明此曰五行庶子第四星不明者主日第五星不動者天之柱爲天心也占曰北極五星亾期八年中國無

主佞臣在位大流星出入爲天子大使出入客星出入紫微帝不昌大臣逆以日占國

淳風曰以客星犯北極占君黑憂赤兵大臣逆致死白爲喪黃喜國昌八百年彗孛出入除舊布新以歲占期

勾陳主後宮天帝正妃萬物之母六星則六宮也明大者曰元妃又曰太后女主餘者從妃不欲明明大女謁盛黃潤與黃氣入後宮有子孫之喜彗孛于犯後宮不良有誅者以日占期

天皇大帝一星黑色在勾陳口中稍微者是其神曰耀魄寶主御天下羣靈河洛之命皆稟焉占曰大人之象其光芒動人君不治政淫佚失常流星從大帝出爲人君發大使星小小使流星從外他宿入大帝星謂君心神恍惚煩燥不安宜赦令以日占國彗孛于犯除舊布新宮中有逆謀之奸五帝內座各順五方之色爲五帝之神客彗孛于犯斬幸臣大臣死以日占國

四輔四弼臣帝之樞衡佐帝不欲明明動大臣闕

管窺輯要 卷之十八 三  
官弄權以月建占國客彗孛于犯有闔宦大臣當  
誅者以日占期

華蓋杠卽蓋柄主覆蓋大帝星狀如傘蓋蔭紫微  
宮客彗孛于犯主乖亂天子不治朝奸臣在側

六甲分陰陽紀節候布政教授農時在帝旁出入  
省察時候流客于犯太史官廢

大理平刑斷獄官 御女天子八十一御妻 八

穀稻黍稷菽大麥小麥大荳小荳 扶筐盛桑器

近織採桑 天厨大烹官 内階乃天階屬 内

厨乃六宮之内飲食厨 陰德明太子代主 女

史主傳漏奏報動靜 尚書納言朕命惟允 柱

史古者君側有左史紀過右史紀言

天柱建政常以朔望日懸禁令於天柱以示百官  
有司

太一天帝神主使十一神知水旱風雨兵革饑饉

天一天帝神主戰鬪知吉凶治十二神將天一光

明潤澤天子安康

文昌北斗魁前天之六司主集計天道第一星日

大將軍主建武威第二星曰次將主尚書左右丞  
第三星曰貴相太常卿均禮樂第四星曰司錄主  
賞功能第五星曰司命司恠占風雲氣候第六星  
曰掌刑司法星動搖故其所動之名不順天子知  
而治之第六星動法司不平客守彗孛于犯除舊  
布新文臣從逆受誅以日占期

三公在北斗柄東爲太尉司徒司空之象主贊揚  
帝道宣德奉化佐理陰陽移徙大臣三公不安客  
守彗孛于犯三公死以日占期近斗柄一星南太  
尊在中台北巫咸謂之北聖公守常吉彗孛于犯  
貴戚卿死天牢在北斗下與中台相對爲貴人之  
牢彗孛客守犯大臣貴戚災黃赤氣出天牢有赦  
流星出入亦有赦

北斗者陰陽之元本亦曰帝車主號令運乎中央  
以齊七政建四時均八節運五行定紀綱彌九重  
施行正化皆繫於斗也魁四星爲璇璣柄三星爲  
玉衡人君之象從魁第一星名天樞正星主德天  
子之象主天秦國第二星曰璇法星主陰刑女主

之象主司閨闈陰教主地楚國第三星曰璣令主  
禍主火梁國第四星曰權代主天理伐無道之國  
主水吳國第五星曰玉衡主殺主中央土趙國第  
六星曰開陽危天倉五穀主木燕國第七星曰搖  
光部星應金齊國

華歧以北龍門積石南至三危雍州等屬魁太行  
以東至碣石至王屋砥柱冀州屬璇星三河雷澤  
東至海岱兗青州屬璣星象山以東至羽山南江  
會震澤徐揚州屬權星東至雲澤九江衡山荊州  
屬玉衡星荆山西南至岷山山距鳥鼠涼州屬開  
陽星外方熊耳以至泗州倍尾豫州中原屬搖光  
星○天子不祀祠名山不敬鬼神則第一星不明  
數土功壞洪山陵逆地理不從天則第二星不明  
天子不愛百姓殘暴酷虐則第三星不明發號施  
令不從四時則第四星不明用樂聲淫佚則第五  
星不明用文法不正則第六星不明不修江河淮  
濟之祠則第七星不明  
君若正行法不私用賢去佞卽北斗均明

輔一星附北斗柄第六星近審大臣丞相之位而  
大明大臣不任職明與北斗齊有暴兵起暗而遠  
北斗大臣死若近粘北斗臣專黨彗孛客守犯大  
臣受誅死

天理在北斗魁中執法之官丞相之位占明及小  
星多者貴人下獄不明斗魁激清考天理有四星  
黑小不明乃純全天理乃至聖之星決非執法之  
官已妄註步天釋義存詳

天相一星在北斗南總領百司佐帝王宰相之位  
明則宰相稱職暗則無調燮之能

勢四星在太陽守西北闔宦重臣最近君王者也  
不宜明明則專政弄權蔽主彗孛干犯則闔宦作  
奸受誅戮死

太陽守在相西北大臣之象

紫微垣諸星去極度數考

按北極雖名中宮實居子位對午方北辰自下  
而上出地凡七十五度蓋兩極北高南下天體  
上下側旋故以東北爲中初非高高之中也觀

天者先定中元所在然後二十八宿之半出半沒玩候之昏中旦中從可識矣

中宮紫微垣春秋元命包云紫者此也宮者中也言天神運動陰陽開閉皆在此中文耀鈞云中宮大帝其精北極星含元出氣流精生一

北極五星在紫微宮中一名天極其末曰鈕星天之樞也五星太子帝庶子后宮極也一說專指第一星爲極星

易恒卦彖曰日月得天繫詞云日往則月來月往則日來日月相推而明生焉寒往則暑來暑往則寒來寒暑相推而歲成焉中庸云今夫天斯昭昭之多及其無窮也日月星辰繫焉萬物覆焉三光日月星列象隨天西轉列象諸星也天日夜一周左旋故曰西轉而鈕星不移故曰居其所而衆星共之

楊泉物理云北極天之中極南爲太陽極北爲太陰極日月五星行太陰則無光行太陽則能照故爲昏明寒暑之限極也孔子曰爲政以德譬如北



辰居其所而衆星共之朱子註云北辰北極天之  
樞也居其所不動也共向也言衆星四面旋繞而  
歸向之○舊說皆以鈕星正樞機程子言箴曰矧  
是樞機陳氏註云門之闔闢所繫在樞弩之張弛  
所繫在機

皇祐采仁宗年號以銅儀管候之其不動處猶在  
樞星之末一度銅儀管卽渾天儀窺管○朱子云  
北辰乃天之北極天如水車北辰乃軸處水車動  
而軸未嘗動

從東第一星去極一十五度入心三度主月太子  
也第二星主日帝王也亦爲太乙之座太乙天帝  
之神第三星主五星庶子也第四星爲后宮屬第  
五星爲天樞卽鈕星○五星金木水火土庶子諸  
王也天樞極星

占曰北極鈕星天之樞也不動處若得天心則北  
辰齊列其星明盛則人君昌不則人君耗星暗則  
各以其星所主爲憂災動搖則人君出遊無度青  
而微者凶亾則四方有變客星出之有德令安天

下人主暴驚宗室亂祀郊廟大殺則災畱守之天下憂國易政于犯乘守又爲喪或叛中犯乘守太子或庶子所主皆凶彗孛于犯北極有喪流星入之地動又曰有使出之入乃兵起在外罷抵而過者國改政觸藩屏出入不依門隨其方外國之使來氣之入中蒼白黃兵起黑則大人憂若黃白入紫微宮而連極星則立諸侯類鳥獸則爲喜黃白出之天子賜諸侯王赤而近極出紫微宮中兵起黑而抵北極座左右諸侯臣死又曰北極五星各宜明大一星不明各屬隨所屬爲災如第一星不明太子有憂帝星不明主不用事客星守犯奸邪僭逼其星亾天下亂中國無主

四輔四黑星各去四度抱極樞所以輔相北極出度受政而佐萬機四輔亦曰四隣隣者親也近也前曰凝後曰丞左曰輔右曰弼天子有問無以對責之凝有志而不志責之丞可正而不正責之輔可揚而不揚責之弼書臯陶謨云一日二日萬機言天子以勤儉率諸侯一日二日者言其日之至

淺萬機者言其機事至多

占曰星明小則君臣同道而吉昌暗微則不理芒動則凶去則君臣失禮或有謀彗孛于犯大臣災流星出之宰相出使者橫貫藩屏爲外國使犯則下迫上氣入黃白相有喜 又占曰四輔主輔臣宜小而明吉芒角偏主暗則輔臣退位

勾陳六星距大星去極六度半入壁六度在紫微宮華蓋下後宮也大帝正妃又曰大帝所居之宮亦將軍之象亦爲三公三師三代夏商以前三公無官周以太師太傅太保爲三公後世以太師太傅太保爲三師司馬司徒司空爲三公前漢以丞相大司馬御史大夫爲三公後漢以太尉司徒司空爲三公書周官云立太師太傅太保茲爲三公論道經邦變理陰陽賈誼曰保者保其身體傳者傳其德義師者導之教訓又以少師少傅少保爲三孤貳公弘化寅亮天工孤者特也言三少雖三公之貳而非其屬官故曰孤

占曰勾陳星明大則輔臣強微小則輔臣弱不見

則后惡之佞人用不納忠諫則不明客犯后宮有  
謀彗孛守后宮謀弒君上又爲近臣災客星黃色  
出其旁有獻女者后宮有喜流星入及貫之後宮  
有憂及黜入則防變氣出入黑白大司馬憂蒼白  
爲喪又曰勾陳六星中宮之衛一曰大帝所居之  
宮明大吉暗則人君惡之勾陳大星爲元后餘星  
衆妾一曰天子之司馬主三公三師明則帝后有  
序暗則小人拂意而輔弱天子惡之不見女主惡  
之

天皇大帝一黑星去極八度半入室一十一度在  
勾陳口一曰天皇一曰大帝其神曰耀魄寶主御  
羣靈執持萬神圖也統御衆星之靈執持萬神之  
圖

占曰君聖臣良星色和同天下昇平叀動爲急政  
色青宜黜邪佞不見天理絕滅彗孛干犯除舊布  
新客守宮中有謀流星出入君使出入察奸任賢  
赦及天下氣入黃天子喜白則天子憂亦曰大帝  
其星隱隱不明則吉大明則殺伐天下動搖則君

管窺輯要 卷之十八  
行不中度不見則有憂喪

華蓋十六黑星其七爲蓋距中大星去極二十六度入婁四度其九爲曲爲杠蓋之柄距南第一星去極一十四度半入婁十一度在勾陳上所以覆蔽大帝之座

占曰華蓋正則吉斜則凶昏暗天子失御客星守王室有憂慧孛少犯主兵喪黃氣入天子有喜黑曰氣入天子憂又曰華蓋主文章所以覆蓋大帝明正吉傾側凶

傳舍九黑星距西第四星去極二十八度入胃五度在華蓋上近河賓客之館亦爲驛亭蘇鸚曰傳者以木爲之長一尺五寸書符其上又以一版借封以御史印章所以爲信乘傳者依乘符傳而行若今之使者持節耳師古者以車謂之傳車後有置單馬謂之驛騎漢書云沛公主高陽傳舍卽今之館驛也河天河一曰天漢一曰銀河起東方尾箕間謂之漢津

占曰傳舍移入紫宮則有故人來客守宮中有奸

細慧守則夷狄侵境兵喪起又曰傳舍賓客之館  
芒角明大胡人入中國客守宜備奸細

五帝內座五黑星距中大星去極一十二度半入  
室六度在華蓋下爲斧辰象所以備宸居亦曰集  
議所書顧命云狄設黼辰黼辰卽斧辰也如屏風  
畫爲斧文者如今之綈素屏風有繡斧文所以視  
成綈厚繒也又曰斧辰如屏風以絳爲質高八尺  
東西當戶牖之間繡爲斧文宸居者天子所居之  
宸宮集議者集聚議論處

占曰帝座明正則吉變動爲災移徙大臣憂兵起  
宮門客星守犯下犯上幸臣災慧守守兵喪兵起  
流星出幸臣凶流入使者還干犯臣逆氣入黃喜  
白喪又曰客星犯中座大臣犯主一曰帝座移垣  
外天子出游激清考漢光武召嚴光同卧夜客星  
犯帝座此一時喜起盛事不爲咎

六甲六黑星距南去極一十五度入奎四度在華  
蓋杠旁主出入省察布政教而授農時分陰陽而  
紀節候言出則省視入則審察宣布政治教化敬

授春耕夏耘秋收冬藏之時分理陰陽造化紀記  
八節七十二候

占曰六甲明則陰陽和順暗則寒暑失節不見則  
水旱失節客犯農事廢業彗孛午犯女主擅政君  
惑亂流星出入水旱不節氣入黃太史受賜黑則  
太史憂一曰六甲主政教吉則明潤

御女四黃星距南去極一十三度半入牛乙度在  
勾陳北御妻之象晉志謂之女御宮杜氏通典云  
古者天子立六官三公九卿二十七大夫八十一  
元士以聽天下之外治天子后立六宮三夫人九  
嬪二十七世婦八十一御妻以聽天下之內治蓋  
二十七取三九之數八十一取九九之數禮檀弓  
云舜不立正妃但三夫人夏因而廣之增九女則  
十二人又春秋說云天子娶十二人殷增三九二  
十七人周又增三倍二十七人因爲八十一人漱  
清考詩螽斯羽之語言子孫衆多是文王有百子  
后宮又不止八十一矣後世天子六宮雖設嬪妃  
豈有成限

占曰御女乃侍帝宴寢星不欲明明則女寵盛主  
天子多內寵流星出宮女外嫁流星入外有獻美  
女者彗孛守犯宮妃有陰謀氣入黃后妃有喜白  
喪黑凶亦曰御女主宮妾明則多內寵不見與夫  
行后妃不用有黜者

天柱五黑星距西南去極一十三度入危初度在  
華蓋杠左旁法五行立晦朔晝夜之職○五行金  
木水火土漢律曆志云日有晦朔月有弦望初一  
爲朔十五爲望朔望中一日爲上弦望晦中一日

爲下弦日屬陽月屬陰陰常爲陽消爍自月初月  
從右行漸離於日而明漸生至初七八明半見如  
弓弦故謂上弦至十五日去日最遠故得全其明  
日月相望謂之望月半後則漸近日左畔而明漸  
消至二十二三僅得存半明亦如弓弦故又謂之  
下弦至三十日日月相合爲日消盡謂之晦又主  
建政教張國法之府常以朔望日垂禁令於天柱  
以示百司周禮秋官大司寇云以正月之吉始和  
布治於邦國都鄙乃懸治象之法於象魏使萬民



管窺輯要 卷之十八  
觀治象於暇日而斂之史記云秦商鞅築冀闕王  
氏註曰冀者記也記列敘令當於此門闕也闕在  
門兩旁中央闕然爲道崔豹証云人臣至此則思  
其所闕蓋爲二臺於門外作樓觀於上上圓下方  
以其懸法謂之象魏象者治象也魏者其狀巍然  
高大使民觀之因謂之觀兩觀雙植中不爲門是  
觀於象魏闕一物而三名

占曰天柱明則陰陽和天下平不見則四時失序  
移徙則國易政變動則有司殘酷流星抵犯宗廟  
不安衡出則天子發使威振天下客守則大臣更  
令危社稷彗孛守大臣變亂治法陰謀兵起亦有  
喪氣入黃天子有喜黑凶白喪三公災相死一曰  
天柱明國治昌不見國危

尚書五黑星距西南去極一十九度入尾一十四  
度在太子東主納言夙夜咨謀出納尚書唐虞大  
麓之職堯以舜爲之故書堯典云納於大麓王肅  
曰堯納舜於尊顯之官大錄萬機之政後世乃有  
尚書令尚書樸射尚書丞又舜典云帝曰龍汝作

納言龍臣名納言官名尚書之象言命令政教必  
使審之既允而後行則讒說不得行而矯僞無所  
託矣周之內史漢之尚書魏晉以來所謂中書門  
下者皆此職也尚者上也言最在上總領之也又  
曰尚猶奉也百官言事當有案平處奉之故曰尚  
書隋百官志云尚書出納王命敷奏萬機蓋政令  
之所由宜選舉之所由定斯乃文昌天府也後漢  
李固對順帝曰陛下之有尚書猶天之有北斗斗  
爲天喉舌尚書亦爲陛下喉舌斟酌元氣運平四  
時尚書出納王命賦政四海權尊勢重責望之所  
歸宜擇其人又曰八座大臣之象漢以尚書令僕  
射三公曹吏部曹民曹客曹二千石曹都中官爲  
八座尚書令僕射主出納王命三公曹主考課州  
郡吏部曹主選舉祠祀民曹主繕修工作客曹主  
護駕朝貢二千石曹主詞訟中都官主水火盜賊  
魏以吏部曹左民曹客曹五六度支曹二僕射一  
令爲八坐今尚書也五兵周禮大司馬謂中兵外  
兵騎兵別兵都兵是也

占曰尚書大臣之象小而明吉明大芒角則強臣  
逼主不見則大臣失職凶則大臣黜流星入大臣  
有憂事流星出大臣有使事氣入黃尚書受賜白  
黑憂

陰德二黑星距東去極十九度半入房三度在尚  
書西主施德惠又曰主周急賑撫又爲女主之象  
隋志分陰德二星爲陰德陽德易蠱卦象云君子  
以振民育德禮月令云季春天子布德行惠命有  
司發倉廩賜窮貧賑乏絕開府庫出幣帛周天下  
孔子曰君子周急不繼富周補不足急窮迫也女  
主后也故曰女后象

占曰陰德微則吉明明則太子女后專權自恣客守  
犯民飢發倉廩以賑窮乏彗孛守犯太子后宮相  
連有逆謀氣入黃天子喜黑白憂○一曰陰德主  
嗣立事不宜明明則新君踐祚一曰中宮女主之  
象動搖釁起宮掖嬪妾惡之

大理二黃星距東南去極一十三度半入心五度  
近陰德決獄官卽今大理寺是

管輅神書 卷之十八  
占曰大理明則刑法平允暗則獄訟冤枉流星出則大理出使恤刑彗孛守則刑官逆謀氣入黃大理官有陞遷黑白憂一曰大理主決獄官明則刑憲公平不明則冤酷  
柱史一黑星去極一十八度入牛一十三度在極星東主左右記過史老子在周職居是官後世又以侍御史謂之柱下史古有左史紀動右史紀言秉筆書過曰史

占曰柱史明則史詞直不明則褒貶不當客守則君行非道柱史憂彗孛守罰太子憂氣入黃則史受賜

女史一黑星去極一十七度半入斗六度在柱史北婦人之微者主傳漏主銅壺漏刻事周禮天官冢宰有女史掌王后之禮職又曰婦官也主記宮中事如漢之侍史今考漢女官十四等曰昭儀曰婕妤曰姪娥曰倭華曰美人曰八子曰充依曰七子曰良人曰長史曰少使曰五官曰順常曰無涓並無侍史疑卽長使或少使誤之

占曰女史主記宮中動靜事明則記得其實暗則女官失職

紫微垣十五星東藩八西藩七紫微大帝之座天子之常居主命主度命命令度法度書大禹謨云天命有德五服五章哉言天命有德之人則五等之服以彰顯之五服者周禮小宗伯司服之職云衮冕九章公之服也鷩冕七章伯之服也毳冕五章子男之服也希冕四章孤之服也玄冕一章卿大夫之服也又云天討有罪五刑五用哉言天討

有罪之人則五等之刑以懲戒之五刑者墨劓剕宮大辟也後世以笞杖徒流死五刑○一曰長垣一曰天營一曰旗星爲侍衛備藩臣中間南向如門者闔闔門淮南子曰排闥闔論天門言闔闔使始升天之門上帝所居紫微宮門也說文云闔天門闔門扇或曰闔開也闔閉也闔象乾闔象坤漢建章宮正門亦曰闔闔

東藩近門第一星曰左樞亦曰左驂去極二十七度半入房一度○唐代宗永泰中置內樞密使始

以宦官爲之其職惟承授表奏於內中進呈若人  
主有處分則宣符中書門下施行而已昭宗後至  
僖宗昭宗之時宦官楊復恭等欲奪宰相之權乃  
於堂狀後帖黃遂得指揮公事此其始也至莊宗  
時樞密之職權侷宰相宋朝有文武二柄號二府  
其左樞右樞之謂掌天子之機務及天下邊境軍  
馬之政令卽今之左都督是

第二星曰上宰去極二十八度入尾一度○六典  
云吏部尚書周之天官卿書周官云冢宰掌邦治  
統百官均四海周禮天官冢宰云惟王建國辨正  
方位體國經野設官分職以爲民極乃立天官冢  
宰使帥其屬而掌邦治以佐王均邦國此太宰也  
太宰上宰也周武王時周公旦爲太宰左傳成公  
十五年宋向帶爲太宰宋政和間以尚書左僕射  
爲太宰卽今之尚書

第三星曰少宰去極二十六度入尾四度○六典  
云吏部侍郎周之少宰中大夫也周禮天官小宰  
云小宰之職掌邦之六典八法八則之貳卽少宰

也左傳成公十五年宋魚府爲少宰宋政和間以尚書右僕射爲少宰卽今之侍郎

第四星曰上弼去極二十四度入箕二度○上弼右弼也卽古之中書令

第五星曰少弼去極一十六度入斗十二度○少弼左弼也卽古之中書侍中

第六星曰上衛去極一十五度入女七度半○漢制京師有南北軍掌理禁衛初有衛將軍管分爲左右衛將軍皆掌宿衛營兵每暮一人宿直唐復

爲左右衛大將軍各一人掌宮掖禁禦督攝隊伍又有將軍各二人二大將軍事宋有左右衛上將軍大將軍將軍中郎將並爲環衛官無定員卽今左右都督也蓋上衛卽上將軍大將軍

第七星曰少衛去極一十六度入奎四度○少丞卽古左丞相漢以陳平爲之至成帝置四丞光武減其二惟置左右丞相左丞主吏民章服右丞假置印綬管左丞掌臺內禁令宗廟祠祀朝儀禮制選用置吏右丞掌臺內庫藏及諸器用民戶租布

刑獄軍器督錄遠近文書章表奏事後代因之或稱左軍右軍或稱右網右轄

西藩近門一星曰右樞亦曰右驂去極二十一度入尾八度○右樞即右都督

第二星曰少尉去極一十八度半入軫九度○少尉與秦太尉同主兵之官堯時舜為太尉周更名大司馬漢以周勃為太尉唐以李晟為太尉禮記月令云孟夏之月命太尉贊俊傑遂賢舉長大行爵出祿必當其位尉者自上安下

第三星曰上輔去極一十五度半入翼四度○右

左侍中為左輔即上輔右侍中為右輔即少輔

第四星曰少輔去極一十六度半入柳初度解見前

第五星曰上衛去極一十九度半入參八度

第六星曰少衛去極一十八度半入昴九度

第七星曰上丞去極二十度入胃初度○以上皆

為內輔臣解見前

占曰兩垣星皆欲其明大小有常則內輔盛不明則輔臣為憂開門兵起直則天子自將兵客守奸



細匿朝禁宇守犯則兵喪並舉宮庭有軍戎氣入黃天子有喜白有喪黃雲如劍有男喜如帚是女喜又曰兩垣星明則輔臣強盛不明則內輔失職垣內正南乃日月五星所不至之處若有入中者爲失行當有異姓改立王者主天下大亂占書不載是爲非常之變天子有道北極諸星各自居常無道則各自變色北極生暈不出三十日臣謀主兵亂天下三年乃定

天牀六黑星距西南去極二十二度半入氐三度半當閭闔門外主天子寢舍解息燕休處亦曰在宮門外聽政之象

占曰天床正則人君有慶傾側則人君不安客星入宮中有刺客彗孛守則后妃強叛宮壺有肘腋兵戎流星出入女后有陰謀天子易內氣入黃天子有納美女之慶后宮有喜蒼白氣入人君有疾病出則自愈黑白氣終日不散有喪一曰天床天子燕閒休息處昏久不見君不聽政惑於女謁天乙一星去極二十度半入亢一度半在紫微宮

門右天帝之神主承天運化治十二將司戰鬪知  
人凶吉承天運化言奉承天道運用化機知寒來  
暑往之期明秋收冬藏之候十二將者一貴人二  
騰蛇三朱雀四六合五勾陳六青龍七天空八白  
虎九太常十玄武十一太陰十二太后又按星經  
云天乙一星主王者之卽位激清考天乙在天爲  
天帝神在朝爲最尊諸侯卽今總督十二團營者  
管十二大將軍司戰鬪今之戎政似與此合

占曰天乙光明潤澤則陰陽和萬物成不見則天  
下亂彗孛守犯則宮門不閉臣叛民擾白衣會

太乙一星去極二十一度入亢半度在天乙南亦  
天帝之神主承天運化使十六神如風雨水旱兵  
革饑饉疾疫災害○春秋合誠圖云紫微大帝實  
太乙神精正議云太乙天帝之別名列伯莊云太  
乙天神之尊最貴者宋太平興國六年楚芝蘭言  
按太乙神皆天之尊神行五宮四十五年一移二  
百二十五而一周天十六神一子地主二丑陽德  
三艮和德四寅呂申五卯高叢六辰太陽七巽大

炁八巳大神九午大威十未天道十一坤大武十二申武德十三酉太簇十四戌陰主十五乾陰德十六亥大義又曰太乙主十神一五福二君基三臣基四民基五九炁六大遊七小遊八四神九天乙十地乙穀不熟曰饑菜不熟曰饑天降曰災自作曰害詩大雅生民篇曰無災無害以赫厥靈漑清考六壬一書用十二神暗避子午卯酉四宮太乙一書用十六神多添乾坤艮四宮兩書自有分別者

占曰太乙明大則年歲豐亨不見則水旱爲災彗孛犯守則兵喪饑饉游至客守則宰相有憂

內厨二黑星距西南去極一十九度半入軫一十一度在紫微垣外西南主六宮飲宴事一曰主后夫人太子飲宴○山堂考索云六宮皇后所居之前一宮象王之正寢後五宮象上之燕寢易需卦象云君子以飲食燕樂

占曰內厨居常吉有變凶彗孛守犯宮中內庖當慎飲食防飲食中毒害流入則內庖不潔

天厨六黑星距大星去極二十四度入斗二十三度在紫微東垣北天子百官之厨主盛饌今光祿寺是

占曰天厨守常則吉彗字守犯飲食間防毒

内階六黑星距中東去極二十一度半入軫七度在文昌北天皇之陛一曰大帝升降之階

占曰内階明正則吉傾動凶彗字守犯人君有憂賊臣入朝奸臣在側

八穀八黑星距西南去極三十一度半入畢三度

在紫微西藩外一主稻二主黍三主大麥四主小麥五主大苳六主小苳七主菽八主蔴所以候歲豐歉歉儉少也又曰食不滿

占曰八穀居常八穀成熟一星不見天下大凶民飢死過半

天棊五星距南去極四十四度入箕三度在女牀東北爲天子先驅主藏兵禦難備非常○蘇林曰

正義云能掌切先驅者孫吳兵法云車有中蓋謂之武剛車爲先驅又謂之屬車漢文帝曰屬車在

前又至細柳營勞軍先驅曰天子至光武南征穎川盜賊寇恂對曰臣願執銳前驅詩衛風伯兮篇云伯也執殳爲王前驅左傳桓公十七年齊人侵魯疆疆吏來告公曰疆場之事慎守其一而備其不虞姑盡所備焉

占曰天棊居常吉大明芒角斧鉞用不見則地亾兵起孛彗犯則奸臣賊子當朝欺上

天槍三星距大星去極三十二度半入氐初度在北斗杓東天子之武備所以禦難○左傳定公十一年會齊侯於夾谷孔子曰有文事者必有武備請以左右司馬行公從之書說命云惟事事乃其有備有備無患

占曰攻城襲邑當視天槍芒角則斧鉞用移徙天子失近禦不備戎器不戒不虞客守則奸賊入朝彗孛守則天下有兵朝內有喪一曰天槍芒角亂動則奸賊弑主禍從中發一星不具兵起三星俱不見兵火起

文昌六星距西北去極三十四度半入柳二度半

在北斗魁前天之六府主集計天下事○書大禹  
謨云所謂六府者卽水火木金土穀也此六府者  
財用之所出也故曰府至商之言六府者謂司土  
司木司水司草司器司貨也此六者主藏六物之  
稅也此言六府者卽下文所謂上將至大理也漱  
清考文昌星乃掌天下文章圖書之府此六府是  
六經府易經詩經書經春秋禮記四書集計天下  
古今事孰有大於此者孰有備於此者此六府定  
是六經爲六府也若以貨財爲六府則文昌屬翰  
林翰林清時俊造文章何嘗干一貨財之事焉此  
六府當存辨

近內階一星曰上將主大將軍建威武○三代之  
制天子六軍其將皆命卿故夏書曰大戰於甘乃  
召六卿蓋古之天子寄軍政於六卿自戰國置大  
將軍周末又置前後左右將軍漢高帝以韓信爲  
大將軍元帝以韓安國爲建武將軍晉武帝以羊  
祜爲衛將軍是

二曰次將主尚書正左右○歷代尚書有六曹至

後漢尚書僕射一人後置尚書左僕射尚書右僕射古者大臣出將入相尚書稱次將

三曰貴相主太常卿理文緒○太常九卿之一掌天神人鬼地祇之禮書舜典所謂秩宗是也太常者欲令國家盛太常存

四曰司祿司中司隸主賞功進爵○司祿司中主爵賞功位理司隸者周官也掌五隸之法辨其物而掌其政令一罪隸二蠻隸三閩隸四夷隸五貉隸後漢制有三獨坐謂專席而坐言其尊也而司隸校尉居一焉

五曰司命司恠太史主滅咎○卽今欽天監也又周禮春官小宗伯有太史掌建邦之六典一治典二教典三禮典四政典五刑典六事典

六曰司寇大理主佐理賞功○周禮秋官大司寇之職掌建邦之三典以佐王刑邦國卽今刑部也大理亦周秋官之任秦爲廷尉漢因之景帝中元六年更名大理卽今之大理寺古者賜有功之臣有士名一推忠二佐理三協謀四同德五守正六

亮節七翼載八贊治九宗仁十保運十一經邦春  
秋元命包云文昌六星一曰上將主威武二曰次  
將正左右三曰貴相理文緒四曰司命主災咎五  
曰司中主佐理六曰司祿主賞功進士略有不同  
今錄之以備參考孝經援神契云文者精所聚也  
昌者揚天紀也又名戴筐晉灼曰以其形似筐又  
主刑獄平讞議言平允獄訟也

占曰文昌者主集計禍福明天道經緯天下臣民  
大小均明則王者致太平而天瑞臻光芒潤澤則  
文事修而萬物咸和不明則國多殘害酷吏弄法  
而文事乖張移徙則三公黜降客守犯則宮中有  
奸大臣殃女謁惑天子彗孛守犯則大臣下獄大  
將受誅流星出入則文臣出使氣入黃則文臣受  
賜文章之士進用於朝白則文運衰激清考文昌  
六星列魁星之上獨司爵祿掌文衡卽今侍讀學  
士侍講學士春坊左庶子右庶子左中允右中允  
也中允卽是司中矣必是此六官若刑名法術事  
自有斗罡司之必不屬之文昌



天牢六星距西北去極二十八度半入張六度在北斗魁旁貴人之牢主繩愆過禁暴淫言繩糾罪愆過罪之人禁治暴虐淫亂之徒商書命云繩愆糾謬格其非心

占曰天牢居常吉彗孛犯守三公下獄大將下獄流星出入有赦

勢四黑星距東北去極三十一度入翼二度在太陽守西北爲內侍官刑餘之人主宣王命卽今最貴宦官

占曰勢星不欲明明則闖宦弄權彗孛守犯則闖宦陰謀不避擅權自恣氣入黃則宦官受賜

相一星去極二十八度半入軫四度在北斗南宰相之象總領百官而掌邦教以佐帝王安邦國集衆事黃帝得六相而天下治六相者蚩尤太常蒼龍祝融風后后土也堯以舜宅百揆舜舉八元八愷爲十六相八元者伯奮仲堪叔獻季仲伯虞仲熊叔豹季狸也八愷者蒼舒鼓濤戡大臨龍降庭堅仲容叔達也成湯始置二相伊尹居右仲虺居

左高宗得傳說爰立作相成周召公爲保周公爲師相成王秦始皇置丞相丞者奉也相者助也漢高帝以蕭何爲丞相文帝以周勃爲右丞相陳平爲左丞相後世或更爲司徒或爲宰相或爲大冢宰乃更復無常爲唐世宰相名尤不正初以三省長官中書令侍中尚書令共議朝政此丞相之職龍朔元年改侍中爲左相中書令爲右相宋因唐制以三公至列曹侍郎同平章事爲宰相神宗以尚書左右僕射兼門下侍郎爲兩相後又改尚書左右僕射爲左右丞相

占曰相星明則吉不明不職彗孛守犯則宰相不忠奸謀逆主黃氣入相受賜白喪黑凶

太陽守一星去極三十七度入翼十度在相西爲大將大臣象主戒不虞設武備○大禹謨云儆戒無虞虞度也言四方無可虞度之時亦當謹候畏也詩大雅抑之篇云暨爾人民謹爾侯度用戒不虞激清考易象云除戎器戒不虞

占曰太陽守明吉不見則紀綱廢弛彗孛守則兵

起大臣下獄

三公三黑星去極三十五度入角四度半距東在  
北斗柄東爲太尉司空司徒象主宣德化變理陰  
陽輔佐萬機○公羊傳云三公者何天子之相也  
說苑云三公正天下調陰陽節風雨正義云三公  
主變理陰陽佐理機務司空少吳氏以鳥紀官爽  
鳩氏司空也舜以禹爲司空夏以契孫冥爲司空  
商以咎單爲司空周以毛公爲司空漢更名御史  
大夫爲司空唐以長孫無忌爲司空書周官云司  
空掌邦土居四民時地利孔安國曰司空主司空  
土以居人空者穴也古者穿土爲穴以居人也司  
徒少昊氏以鳥紀官祝鳩氏爲司徒堯時舜爲司  
徒舜時契爲司徒周爲地官司徒漢改爲大司徒  
書周官云司徒掌邦教敷五典擾萬民  
占曰三公星明吉芒角則大臣專權一星去則天  
下危二星去則天下亂三星去則天下易主彗孛  
守犯則天下大亂兵喪三公有下獄者  
三師三黃星距西北去極二十一度入張半度在

北斗魁上爲太師太傅太保之象主宣政化而和  
陰陽 解見前

占曰三師居常吉明大芒角則偏主擅行彗孛守  
有逆謀

天理四黑星距東北去極二十八度入翼九度在  
北斗魁中貴人執法之官尚書爲左執法御史爲  
右執法○漱清考史記漢書註天理四星俱無典  
要若屬尚書御史分左右執法愈無典要况紫微  
垣在巳有尚書五星柱史一星卽屬御史太微垣  
端門左右卽是左右執法焉可以天理強合尚書  
爲左執法御史爲右執法似覺甚是牽強也謂之  
曰天理必如明四月達四聰仁如堯孝如舜征伐  
如湯武公道如孔子抑三家施教化惓惓救世旣  
爲司寇誅少正卯皆純任天理作事此星未始不  
大明於天地蓋後世雖有賢明帝王師相未必盡  
合公道純任天理如三代併孔子者所以此四星  
久不明於中天是世無有純任天理之人無天理  
之象僅存其布位而已况後代世道人心盡是傷

天理作事而達天心合天理幾何人哉既無其人所以無其象又烏得有其占

玄戈一星去極三十九度半入亢四度在招搖北一曰天戈主夷狄又主胡兵車馬○天官書云玄戈亦曰盾天鋒也詩國風無衣篇云王於與師修我戈矛王於與師修我甲兵

占曰玄戈居常不欲明明大芒角則胡兵起邊境不寧彗孛守犯則胡兵大起干戈在國天下不寧北斗并輔八星在紫微垣北七政之樞機七政日

月木火土金水也

樞機解見前

○漱清考北斗經

有九曜星官今步天歌北斗并輔八星尚有一弼沉隱不見常依七星之右旁而行挨吉星則愈吉挨一凶星則愈凶是左輔右弼乃北斗正數合爲九曜星也

陰陽之元本故運乎中央而臨制四方○四方東西南北

建四時○建者五也四時春夏秋冬也春者蠢也物蠢生乃運動開闢之端養生之首歲之始也夏

者假也物假大乃宜平也萬物長養之時也秋孳也物秋斂乃成熟也冬者終也言萬物於是乎終也

均五行○均者平也五行木火土金水書洪範云未日潤下火日炎上木日曲直金日從革土日爰稼穡

移節度○推移節令度數

定諸紀○書洪範云協用五紀一曰歲紀二曰月紀三曰日紀四曰星辰紀五曰曆數紀註曰歲者

序四時也月者定晦朔也日者正纏度也星者經星緯星也金木水火土五星爲緯二十八宿爲經辰者日月所會十二次也曆數者推步之法所以紀歲月日時星辰刻數分秒又爲號令之主又爲帝車蓋取乎運動之義宋均曰大帝乘車巡狩故無所不紀

一至四爲魁日璇璣五至七爲杓日玉衡○書舜典云在璇璣玉衡以齊七政註曰美玉謂之璇璣者機也以璿飾璣所以象天體之轉運也衡者橫

也謂橫簫也以玉爲管橫而設之所以窺璣而齊七政之運行猶今之渾天儀也璇璣典作璿

一爲天樞去樞二十五度半入張十度正星陽德  
○正者政也言國家正教之所出卽爲政以德譬如北辰意天子之象也陽氣輕清上浮爲天天乾也色玄而形穹窿四時代謝運行不息謂之天道有遲有疾有順有逆猶人君有政事也○主日日乃衆陽之宗人君之象○主秦今陝西長安是○一曰九州主冀按書禹貢冀州三面距河兗河之西雍河之東豫河之北周禮職方氏云河內曰冀州也

二天璇去極三十一度入翼一十一度法星陰刑  
○法者刑也言國家刑憲之所自出女主之象也  
○爲地陰氣重濁下凝爲地地坤也色黃而磅礴土地所生風氣所宜萬物資以長養成遂謂之地利○主月月乃太陰之精女主人臣之象○主楚湖廣武昌屬地是○一曰九州主雍按書禹貢雍州之域西距黑水東距西河卽今甘肅屬地是

三天璣令星○令者禁令左傳僖公九年齊桓公  
葵丘之盟申之以五禁初命曰誅不孝無易樹子  
無以妾爲妻再命曰尊賢育才以彰有德三命曰  
敬老慈幼無忘賓旅四命曰士無世官官事無攝  
取士必得無專殺大夫五命曰無曲防無遏糴無  
有封不告○爲人三才人參其中○主禍害主火  
火乃南方熒惑○主梁書禹貢云華陽黑水惟梁  
州註云梁州之境東距華山西距黑水今甘肅屬  
地○一曰九州主青兗書禹貢云海岱爲青州青  
州之域東北距海西南距太山卽今青州府又云  
濟河惟兗州兗州之域東南距濟西北距河卽今  
兗州府

四天權去極二十七度入軫初度伐星○周禮大  
司馬掌九伐之法一青言四面削其地也二伐言  
兵入其地也三壇言置之空壇出其君立其次賢  
者也四削言削其地也五侵言加其敬也六正言  
執治其罪也七殘言殺之也八杜言塞之使不得  
鄰國交通也九滅言誅滅之也○爲時時者序也



謂春夏秋冬四時○主天理伐無道主水即北方  
 辰星○主吳越吳蘇州越紹興揚州之域○一曰  
 九州主揚徐按書禹貢云淮海惟揚州之域北至  
 淮南東至於海即揚州之府又曰海岱及淮惟徐  
 州徐州之域東至海南至淮北至太山即徐州  
 五玉衡去極二十八度入軫一十一度殺星○古  
 者法官以七煞定罪一謀殺二鬪殺三故殺四誤  
 殺五戲殺六劫殺七過失殺○為文昌為音音樂  
 音也有八音一金鍾鎛也周禮春官鎛師篇云鎛

如鍾而大杜預謂之小鍾或曰鍾上橫木也二石  
 磬也三絲琴瑟也四竹簫管也五匏笙也六土塤  
 也七革鼓鼗也八木祝敔也○主中央助四旁殺  
 有罪主土即中央鎮星○主趙今邯鄲縣屬地○  
 一曰九州主荆按書禹貢云荆及衡陽惟荆州之  
 域北距南條荆山南及衡山之陽即荆州府  
 六開陽去極三十度入角二度半危○危高也言  
 高而不危意○為律六律為陽正月太簇三月姑  
 洗五月蕤賓七月夷則九月無射十一月黃鍾○

主天倉五穀禾蘇粟麥豆爲五穀亦曰黍稷蘇麥  
荳○主木卽東方歲星○主燕今幽州是○一曰  
九州主梁 解見前

七搖光去極三十七度少入角九度部星○部者  
分也是分部斗罡亦曰應星○應當也上下感應  
之謂○爲呂爲陰二月夾鍾四月中宮六月林鍾  
八月南呂十月應鍾十二月木呂○主兵主金卽  
西方太白星○主齊今青州府是○一曰九州主  
豫書禹貢云荆河惟豫州之域西南至南條荆山  
北距大河卽河南府是

輔一星附於開陽佐斗成功去極三十度入角二  
度有丞相之象○王氏曰丞承也相助也謂掌承  
天子助理萬機者占曰輔星明而斗不明則臣強  
主弱斗星明而輔星不明則主強臣弱斗旁小星  
多則爲安兆少則人怨天下多訟樞星暗則不敬  
宗廟慢鬼神璇星暗則廣營宮室安鑿山陵璣星  
暗則不愛黎民暴行徭役權星暗則號令不合天  
道不順四時玉衡暗則廢棄正聲務淫聲開陽暗

則嚴法峻刑棄

天棊在女床東北爲天子先驅設武備戒不虞之氣明大不俱國兵起

天槍三星在北斗柄主武備亦曰天鉞

玄戈在北斗杓端天戈也主北夷明則兵起

三師卽三公之位 在北斗魁西主理七政宣德化和陰陽○傳舍乃驛亭

三台亦三公之位 近文昌二星曰上台爲司命主壽上星曰人主下星曰女主與軒轅相對二星爲

中台主宗室爲司中上星諸侯下星卿大夫抵太微二星爲下台司祿上星曰元士下星曰庶人知陰陽占色齊明星而列行君臣和不明乖戾動搖一星去天下危二星去天下亂三星去天下不治月入三台大臣誅以日占期

紫微垣列座以下畫之

北極

北極五星在紫微宮中一曰北辰天之聚尊星也其紹星天之樞也天星無窮二光迭耀而極星不

管窺輿要 卷之十六  
移故曰居其所而衆星拱之其第一星主月太子也第二星主日帝王也亦爲太乙之座謂聚明而赤者也第三星主五行庶子也第四星后宮也第五星天樞也張衡云二星並爲后宮北極主出度天子有道則北極齊明不明則人星耗中星不明主不用事右星不明太子憂左星不明庶子憂北極明大而數動搖則天子好遊色青而微則天子凶北極星亾則中國無主天下亂北極星皆不明而大星獨居天下易姓人相食荊州占曰天樞大端指心小端指參故用兵者順行皆天樞則青龍在左白虎在右朱雀在前玄武在後朱雀者七星玄武虛危也

附客星流星彗孛雲氣干犯占

客星出北極旁帝王暴驚宗室亂宜修郊祀奉宗廟行德令以禳之一曰客星出北極旁女主謀篡位

赤星出北極天下兵車盈野星所之國大敗  
客星入北極天下道塞人主有非常之變

客星犯北極大人死有反者

客星守天樞天下憂國易政若犯太子則太子憂  
犯庶子則庶子憂后宮亦然

流星出北極天使出入之使入

流星出辰地動兵在外者罷一曰有使出

流星入北極天下道塞兵大起國有大變大人憂  
之

流星抵北極而過之天下有大喪兵起將軍戰死  
大臣戮

流星抵北極而止視其色前赤後白有來言兵  
者成前白後黃人主立太子有裂土者色赤而前  
黃饒有來吾國而死者色白前後皆饒有來言通  
好者常以戊日視北辰有流星出之則天子有德  
令

彗孛出北辰臣謀君天下亂有立王

彗孛犯北辰天下兵起有大喪君臣相謀除舊布  
新易姓革命

蒼白雲氣入天樞中天子憂疾出天樞則禍除黃

管窺輯要 卷之十一  
白雲氣入天樞外方入貢出則天子有賜於諸侯  
黑氣入天樞天子憂

黃氣出太子座期六十日太子卽位

赤氣入天樞天下兵起出天樞天下有兵

### 四輔

四輔四星抱北極之樞所以輔佐北極而出度授  
政張衡曰四輔爲輔臣之位主贊萬機星小而明  
事吉明大芒角則臣逼君暗則輔臣失機政事不  
理星亾則君臣失禮輔臣有誅死者

客星犯四輔人主憂宰相死一曰三公大臣有殃

### 近臣死

流星抵四輔宰相黜流星犯四輔天子徙迫

流星出四輔宰相出使流星橫貫四輔外國有使  
來

彗孛犯四輔輔臣有戮死者人主惡之一曰有赦  
有兵喪

黃白雲氣潤澤入四輔輔相之臣有喜

赤氣入四輔輔相者憂兵

白氣入四輔輔相失位或憂兵或疾病

天乙

天乙星在紫微闈闔門中右星之南主戰鬪又主天道知人吉凶其星欲小明而有光則陰陽和萬物盛星大盛明則水旱不調五穀不成天下饑人流亾黃帝占曰天乙星光明潤澤則天子吉星亾則天下亂人主亾五星守犯天乙幸臣謀亂兵起人主憂若守之臣弑其君餘殃爲水旱兵飢死喪之災

客星犯天乙五穀貴守之宗室不安國危亾守二月事成客星歷天乙宮門閉王者內不安近臣亂不出三年

客星守天乙人君納佞棄忠君臣異心以亾其國流星抵天乙兵滿野人流冬澇夏旱萬物不成穀貴人疲一日兵起大戰開元占曰流星入天乙旁穀熟天下安

彗孛犯天乙大臣謀叛篡弑禍作石氏曰白衣會聚兵大起天子宮門閉天下易主

黑氣入天乙宰相黜

黃雲氣潤澤出入天乙君臣和天下平

### 太乙

太乙一星在天乙南相近天帝之神也主使十六神知風雨水旱兵飢疾疫所在之國星明有光則吉暗則凶太乙離其位而乘斗後九十日兵起五星犯太乙占同天乙火守之餘殃爲水災

客星守太乙兵起天下大旱且大水貴人死民飢疫流散

流星抵太乙宰相下獄流星入太乙占同天乙流星出太乙君納佞棄忠荊州占曰太史黜

彗孛干犯太乙兵喪水旱俱起天下革命

黃白氣出入太乙百官受賜

赤氣出入太乙大旱兵起黑氣大水蒼白氣大疫死喪

### 勾陳

勾陳六星在紫微宮中蓋之下大帝之所居也巫咸曰勾陳者天子護軍水官也六星爲六軍一曰



勾陳爲法官大帝之正妃故爲萬物之母而象六宮之位其端大星爲元妃餘星乘之爲庶妾荊州占曰勾陳天子之司馬也主三公三師其星明盛則天子輔周暗小則輔弱不見則女主惡之又曰天子不納忠諫而用佞臣則勾陳不明

五星入紫微犯勾陳天子憂後宮有犯幸臣謀逆宮兵起

客星守勾陳後宮有女客欲謀主者一曰兵起將軍凶

赤星出勾陳兵起大戰將有功

黃星出勾陳有進美女者一曰兵在外者罷

赤星入勾陳有劫主者若犯之宮中有變臣爲逆王者憂一曰兵亂司馬死星入勾陳天子命在大司馬黑星入勾陳大司馬溺水死流星出勾陳後宮有變蒼白星入勾陳大司馬死流星貫勾陳后妃有黜者

流星入勾陳有劫主者一曰臣謀主兵起宮中不出三年流星冲入勾陳使運見天子不出七日以

管窺朝野 卷之十八  
色占其吉凶

彗孛出勾陳幸臣亂宮中有誅者一曰臣爲逆蒼  
白雲氣入勾陳中大司馬憂○出勾陳將憂軍破

赤雲氣入勾陳內亂大司馬戮死

赤雲氣出勾陳中兵起大戰將有功

白氣出入勾陳天子立宗廟黑氣入勾陳大司馬  
憂黃白氣入勾陳天子立大司馬兵在外不戰黃  
氣光潤入勾陳天子立后

黃白氣出勾陳兵吉罷

### 天皇大帝

天皇大帝一星在勾陳口中其神曰曜魄寶主出  
命符以授天子立五祀御羣靈乘萬機握神圖其  
星帝隱帝隱不明明則爲災若光動有芒角則失  
常人君行不中度星亾則天理絕滅

客星犯大帝除舊布新天子易政

客星守大帝宮中有客謀天子者

流星犯大帝天下亂臣叛主易政

流星出大帝座天子使出流星抵大帝座君失其

宮流星如月出大帝座投入濁霧之中天子棄國  
出走

彗孛犯大帝座若出之天下更改

雲氣黃白入勾陳覆大帝光明潤澤天子有喜

黃白氣出大帝座改立王者

白氣如粉絮出入勾陳大帝座天子憂

### 五帝內座

五帝內座五星在紫微宮中華蓋下勾陳之上斧  
宸之象所以備宸居者其星明正則吉動變則宸  
居不安

客星犯帝座臣犯主大臣誅國易政民人大亂宮  
廟徙客星出帝座邊兵出一曰天子有大使出大  
將軍出幸臣謀誅不則自殺

流星犯帝座兵起國門大臣作亂

流星抵帝座國易政主徙其宮凡流星出帝座皆  
爲天子使出入則使入以色言其吉凶三垣帝座  
其占同

彗孛出帝座除舊布新易政革命

基宇犯帝座民飢大亂宮廟徙大臣憂期三年一  
日兵起宮闕宗廟毀絕三垣帝座同占

蒼白雲氣入帝座天子有喪事赤氣入帝座人主  
立廟黑氣入帝座人主憂病

黃白氣狀如杯碗正圓入紫微宮中帝座有獻璧  
玉者

赤氣出帝座臣謀君入之防奸人

青白氣出帝座而徑出南門者人主失其宮

### 陰德

陰德二星在紫微宮內尚書之西主調給賑卹行  
德施惠一曰陰德爲天一綱主正經其星明見則  
近臣恣庶雄謀天子有逆謀若有女主治天下者  
動則君臣相攻無明則聖人絕  
客星犯陰德大旱民飢流亾者半守之天下倉廩  
發

流星犯陰德天子政令不行

流星入陰德輔臣守錢穀者黜

彗孛犯陰德太子有逆謀

彗孛出陰德後宮與太子連謀爲變

賜  
黃雲氣入陰德天子有喜黃白氣入陰德諸侯受

青白黑氣出入陰德太子憂

尚書

尚書五星在紫微垣門內東南維八座大臣之象  
主咨謀納言其星小而明則吉明大而芒角則臣  
強逼君暗則臣失職星不見則輔臣誅

客星犯尚書大臣死不則有貶黜守之八座有下  
獄受誅者凡客星有抵尚書人君不納忠言諫

黜退

流星入尚書八座官憂黜流星出尚書有出使事  
彗孛出尚書八座官有謀反者犯之太子有謀尚  
書大臣有以家事坐罪者

黃雲氣入尚書八座官受賜

赤白氣入尚書八座官有受土地出鎮者

黑氣入尚書掌刑法者罪期不出半年

柱史

柱史一星在北極東近尚書主左右紀君過古有左右史是其象也一曰厨書之所藏也星明則史直不明則反是

客星犯柱史柱史憂一曰君行非道而柱史受賜守柱史而柱史有黜者

流星入柱史君自示其咎一曰柱史受刑

彗孛犯柱史右左有賜爵之喜

蒼白氣入柱史左右史有死者

黃白氣入柱史左右有遷

### 女史

女史一星在柱史北婦官之微者主傳漏記時漢有侍史其象也張衡曰婦官主記宮禁動靜之事星明則記事實微暗則婦官失職

客星犯女史婦官憂

彗孛犯女史女史受誅大抵占同柱史

### 御女

御女四星在紫微垣宮內勾陳之北八十一御妻之象也一曰御史宮主禮儀侍帝宴寢星不欲明

明則君多內寵

客星抵御女宮中有謀一曰有自戮者守之後宮有廢黜者不則有女客入宮有謀

流星犯御女後宮有黜者一曰天子以宮女賜人流星抵御女後宮女有出嫁外國者

流星出御女宮女有出者流星入御女外國有進美女者

彗孛犯御女後宮有戮者出御女後宮有欲謀主者星孛御女大人惡之

赤黃氣入御女后妃受賜

黃白氣入御女後宮得寵者有子孫喜

蒼白氣入御女後宮有病黑氣入御女後宮有死者赤氣入御女內人有誅死者

天柱

天柱五星在紫微宮中華蓋杠左旁近東垣北隅主建政教懸法禁又朔晝夜之職周禮以歲之正月示法象魏其象也星明大則陰陽和天下平不明則寒暑失節離傾則國易政變動則司歷有殃

客星犯天柱國中有賊大臣爲變欲危社稷  
客星守天柱人主徙其宮君臣皆憂守之三十日  
已上不去作亂者事成

流星抵天柱宗廟不安巫咸曰易主有更改三分  
憂

流星沖入天柱人主憂使臣還

流星沖出天柱天子發火使出振威天下

彗孛犯天柱臣叛主憂天子易宮遜位可以除咎

黑氣入天柱三公災一曰相死

雲氣赤黃入天柱天子喜有封陵廟之事出天柱

三公賜爵天下受賜

大理

大理二星在紫微宮內垣門之左近陰德平獄之  
官也星明則刑法平不明則獄多枉濫

客星犯大理貴人下獄色白受誅色黃遇赦

客星入大理帝王欲振威諸侯有殂天理占同

客星守大理獄有枉滯一曰刑獄官有黜者

流星出大理刑法之官出使流星犯大理刑獄官



彗流星抵大理決獄不平刑獄之官黜  
流星入大理大臣有以家事坐罪者

彗孛出大理刑獄之官憂彗孛犯大理貴人下獄  
黃雲氣入大理刑法官有遷巫咸曰有赦  
黑雲氣入大理決獄不平刑法官受誅

### 六甲

六甲六星在紫微宮內華蓋杠旁主分陰陽紀節  
候所以布政授時星明則陰陽和不明則寒暑易  
星芒不見則有水旱之災

客星守六甲色赤爲旱色黑白多水疾病

流星抵六甲術士憂流星貫六甲太史廢一曰旱  
潦不節農失其時寒暑易候流星犯六甲賢良用  
彗孛犯六甲反主出政令荊州占曰日月食一曰  
人君廢  
黃雲氣入六甲術士用黃白雲氣入六甲太史受  
爵賜黑氣入六甲太史憂

### 華蓋

華蓋七星杠九星共十六星在勾陳上所以覆蔽

大帝之座其星明正則吉傾動則凶離徙則人君失御荊州占白正上柱蓋者名曰杠星次蓋大星爲母中央爲身母身下二寸者妻子也其下有一小星不當見見則太子不得伐主若所有異姓立者

客星犯華蓋王室大亂兵起四方天子宗廟不祀守之執法臣有黜者

流星出華蓋內使發不過三日流星犯華蓋使還

有功流星抵華蓋天子失宮闕若貫之三公以罪殺兵起宮中

彗孛犯華蓋天下兵起國易政

黃白氣入華蓋天子有喜黃氣出華蓋天下方鎮官皆有賜白氣入華蓋天子宮中有喪赤氣入華蓋防奸客

傳舍

傳舍九星在紫微宮外華蓋上近河賓客之館舍也主備奸使水官也星移入紫微垣間則狄人入官兵起天子憂

客星守傳舍有奸使一曰狄兵起大使轉粟天下  
自河之東有劍戟之憂

彗孛流星犯傳舍皆爲狄人入中國  
黑氣入傳舍狄兵起

內階

內階六星在紫微垣外文昌之北天皇之階也主  
明堂其星明正則吉傾動則國有憂

客星犯內階有奸臣在君側

流星抵內階人主憂若廢退犯之使者至一曰有

陰謀事

天厨

天厨六星在紫微垣外東北維天子百官之厨也  
主御膳星見則吉不見凶星亾則天下飢

客星守天厨大飢人乏食又曰食官有變

流星犯天厨大飢人流亾

黑氣入天厨飲食中防有置毒者

天床

天床六星在紫微闈闔門外天子寢息燕休之所

也其星明大平正則吉傾側則人主不安暗則人主憂

客星入天床宮中有刺客一曰左右侍臣有變若守之十日則事成

流星入天床后妃謀主一曰主立流星抵天床天子易其內寢流星犯天床謀兵動主憂

彗孛犯天床天子灾近臣篡奪一曰御寢火災仍防刺客

黃氣入天床天子納美女出天床有疾后宮有

子喜蒼白氣入天床君寢疾出之疾愈青黑氣入天床人主憂且疾白氣入天床人主惡之

### 內厨

內厨二星在紫微垣外西周角宮內飲食之府也一曰后夫人太子飲食之厨也星有變動則凶

客星守內厨天下飢一曰食官有變

流星入內厨有進飲食者色青黑有毒

彗孛犯內厨天子宮中慎飲食流星犯之占同黑氣入內厨飲食防毒

天理

天理四星在北斗魁中執法之官決獄之職貴人之牢也天理水官也主司三公糾貴臣星不欲其明明則法令峻急獄事煩多動搖及其中有小星皆爲貴人下獄君有憂

客星犯天理天下多獄廷尉亦坐之

客星入天理法令不明大臣有誅者

流星入天理貴人下獄一曰人多繫獄者不出其年

流星犯天理帝欲振威諸侯有殂

彗孛出天理將相戮人主走

赤雲氣入天理兵起相出師

相星

相一星在北斗南之丞相也所以總領百官以佐帝王安邦國集衆事主衣服文章其星明大則天子明忠臣用星亾則輔臣有黜者一曰相死不則出走

五星犯相星輔臣凶

火守相星三十日大臣作亂天下兵起人主憂  
客星出相星天子有變令犯之天下更變人民多  
死  
流星犯相星三公將相有憂王者憂  
流星犯相星近抵之大兵起大將出輔臣憂  
彗孛犯相星輔臣憂不出其年天下更令民多移  
徙黃白氣入天相將相有喜黑氣入天相將相憂  
死

### 太陽

太陽一星在天相西大將大臣之象所以守衛天  
子之宮衛守諸門主武備戒不虞其星明則人主  
威伏四方天下治安不明則主令不行天下不治  
移徙則天子有大憂大臣誅不見則兵起  
五星犯守太陽大臣戮死

火犯守太陽執御在外之臣憂內將軍有死者  
客星犯守太陽將相憂兵起流星抵太陽兵起將  
相出流星出太陽天下憂國易政  
彗孛犯太陽兵起將相憂

黃氣入太陽大臣受賜三公有喜

蒼白氣入太陽將軍戰死赤氣入太陽宰相憂

### 勢星

勢四星在太陽西北刑餘之人也其星不明則吉明則閹宦弄權

客星彗孛犯勢星中官受誅黃氣入四勢中官受賜赤氣出入四勢中官反黑氣入四勢中官憂

### 三公

三公三星在北斗魁西主變理陰陽弼成機務又

曰三公三星在北斗柄東三師主宣德化調七政和陰陽皆天子之輔臣星欲其大明黃潤則吉色赤有兵蒼白黑皆有喪三公一星去則天下危二星去天下亂三星亾天下易主

五星犯守三公皆爲三公死

客星流星犯三公宰相三公憂一日被冤

彗孛犯入三公將相有下獄死者

### 文昌

文昌六星在紫微垣外北斗魁前如筐形天之六

府也主集計禍福明天道經緯天下天官書曰斗魁戴筐六星曰文昌六星之會計也起北斗魁前近內階第一星爲上將主建威武次二星曰次將主正左右次三星曰貴相主理文緒次四星曰司命主賞功進德次五星曰司中主司過詰咎次六星曰司祿主佐太寶黃帝占曰文昌者天府之離宮也其星明大齊同則王者致太平天瑞臻不明則道術隱藏其色黃潤光明則萬民安青黑微細則天下多憂人相殘害動搖移徙則三公受殃女主忌之

月暈文昌有大赦歲星犯文昌天下兵起有走王熒惑入文昌宮中有兵天下耗大亂王者憂火守司祿民大疫舍司命童子疾鎮星犯文昌占同歲星

太白入文昌天下兵起有走王一日三軍反兵滿都國亾辰星入文昌占同太白

客星犯文昌輔臣有憂大臣謀叛宮中有兵入文昌有女子惑天子者色青將有憂一日故臣有抵



罪者色黃受封色黑將死

赤星入將相提鼓之將驚

客星入相星色黃白皆為故臣有受賜受爵者入

司命內亂一曰色青近臣憂色黃皆有喜色白近

臣有抵罪者色黑近臣死入司祿色黃白近臣有

喜色青黑近臣有失爵者

客星出司命近臣有抵罪走者色青憂黑死司中

司祿同赤星出司命天子病困青黑星入司命中

奸臣入出之奸臣出荆州占曰有星入司中色蒼

者有賊

流星犯文昌國亂宮庭有兵期三年

流星入文昌邊臣入朝視其所起知其地視其色

知其吉凶流星出文昌三公出鎮視其所之知其

地一曰貴臣出師一曰貴臣將相有下獄貶出者

當以色占之

流星冲文昌公卿大臣有大憂

奔星入文昌國內亂出文昌去其君

彗孛犯文昌輔臣災一曰三公下獄有急兵國易

政

彗孛出文昌天下亂大臣受殃國易政出上將大將軍反出次將左右將軍反出貴相大司徒反出司祿大臣得勢者反出司命天下有權力者反黃白雲氣入文昌將相有黜者蒼白氣入文昌將相有憂黑氣入文昌三公死或廢黜赤氣入文昌術士有謀反舉兵者黑氣入司命司中司祿天下嬰兒多死

天牢

天牢六星在北斗魁下貴人之牢也主繩愆禁淫其中無星則天下安有星則賢士傷星衆則貴人多下獄明大動搖則侯王有繫者天子憂月暈天牢天下大敗多盜賊一曰貴人有下獄者月入天牢臣謀反事泄入獄五星犯天牢王者以獄爲弊貴人多下獄者守天牢貴人多枉死者

火入天牢若守之二十日名人有繫者一曰有赦火犯守天牢有叛臣篡位弒主不出二年一曰人

相食國有暴兵

火土守天牢大魚死人相食守二十日以上大赦

一曰鈇鉞用以初守日命國

客星入天牢斧鉞用諸侯有納土者海中占曰有

德令有赦荆州占曰貴人有囚繫者出天牢王者

賜諸侯地

流星入天牢貴臣下獄人民多以罪繫不出其年

荆州占曰太僕名臣有繫者其色黃白無故青憂

黑死赤受誅復出則繫者出以丑未日者候流星

入天牢則有赦又曰天牢有使星出一星出小赦

二星出赦畿內三星出大赦天下

彗孛出天牢諸侯相賊豪傑中起大臣多下獄死

其國亾

赤雲氣入天牢有反獄者一曰獄中火起

黃白氣入天牢大赦天下

黑氣入天牢三宮將相受誅貴人親屬有憂

白氣大圍長二三丈出天牢天下不安五穀貴貴

人及親戚必有斬死者

八穀

八穀八星在紫微西藩之外五軍之北華蓋之內  
西主候歲豐凶土官也一主稻二主黍三主大麥  
四主小麥五主大豆六主小豆七主粟八主麻其  
星明則八穀成暗則八穀不成一星不明一穀不  
成三星不明民食不足八星皆亾天下大飢  
客星犯八穀天下穀大貴兵以飢起王者失位  
彗孛犯八穀水潦穀大貴  
黑氣入八穀天下萬物不成人飢死大半

天棓

天棓五星在紫微垣外女床北天子之先驅所以  
禦難備非常也主禁暴防不虞又主爭訟其星微  
明而靜則天下戢兵明大動搖則兵大起不明亦  
爲兵起邠萌曰天棓明大則國有憂明大則斧鉞  
用一星不具則兵起

五星犯天棓邊夷兵起防戍有憂一曰邊城有誅  
者不出其年黃帝占曰兵四起斧鉞用守之同占  
客星犯天棓有大喪國兵大起

客星出天棊下謀上兵大起貴人有戮者  
流星犯天棊后妃有殃一曰諸侯多爭地者

流星入天棊國中貴人多死一曰流星入天棊兵  
起有戰流星冲天棊兵革興盜賊大起

流星出天棊四處安

彗字出天棊兵大起有亾國走王

蒼白雲氣入天棊國有喪出之則禍除

蒼白氣出天棊天子先驅有邦賜者

黑氣赤氣入天棊大人憂之

黃氣入天棊天子先驅有邦賜者出之有餘出者

赤氣出天棊兵大起將軍戰死

### 天槍

天槍三星在北斗徭光之旁一曰天鉞天之武備  
以守衛紫微宮金官也其星忽明忽不明明明大則  
斧鉞用伏兵行小而不明則兵敗移徙則君失御  
芒角動搖則兵大起石氏曰天槍以備非常攻城  
襲邑當視槍星大而明不可出兵小而明則兵可  
出城可襲天槍角動臣弑主禍從中發一星不具

則兵起

五星守犯天槍占同天禧

客星犯天槍斧鉞用兵大起民飢流亾入天槍天下有兵飢荆州占曰有大戰出天槍兵將大出期一年

流星犯天槍外夷來侵邊防有憂兵起王者憂

彗孛出天槍王者備四夷邊兵有驚民憂

彗孛入天槍若犯之鈇鉞大行誅殺不當

赤雲氣入天槍天子驚一曰失位

蒼白氣入天槍兵起

玄戈

玄戈一星在北斗杓端招搖之下一曰玄戈主北夷其星微而小明則天下安明大則夷狄恣橫明動則狄入中國暗則狄兵退芒角則狄兵大起玄戈主狄兵小動則兵小起大動則兵大起狄入境石氏曰玄戈色赤天下有兵

五星犯守玄戈車騎滿野

木星犯玄戈兵大起狄爲寇若守之狄人敗狄王

死土星金星水星犯守玄戈與木同占

火星犯玄戈主居縷宮女令橫行必左右占其方

石氏曰人主亂於色一曰狄寇入邊兵大起若守

之狄人敗狄王死

客星犯玄戈狄人大敗

客星守玄戈天子憂狄兵入

流星入抵玄戈狄入中國

彗孛犯玄戈戎狄大赦出之北狄有亂

黑氣入玄戈狄兵退

赤氣出玄戈狄兵大起

蒼白氣入玄戈狄人大疫死

Vertical columns of faint, illegible text on the right page, possibly bleed-through from the reverse side. The text is arranged in approximately 10 columns, with the leftmost column being the widest and the rightmost being the narrowest. The characters are extremely light and difficult to discern.

Vertical column of faint text, likely bleed-through from the reverse side, located in the second column from the left of the right page.

Vertical column of faint text, likely bleed-through from the reverse side, located in the third column from the left of the right page.





